



Dispela poto i soim sampela pipel long Port Moresby i sanap long maket na i kaikai buai.


Dispela em i no pasin bilong Papua Niugini tasol. Nogat tru. Samting olsem 200 milion pipel i save mekim wankain. Na yu ken painim ol long Afrika, na India, na Saina, na Tailan, na Vietnam, na Filipin Ailan, na Indonesia, na Maikronesia, na Malaya.

Long sampela kantri ol manmeri i save sindaun nabaut na toktok na smokim sigaret o dringim wain o smokim paip. Long dispela hap bilong graun, ol i sindaun kaikai buai. Ol yangpela pipel, ol pikinini yet,

na ol lapun i save kaikai buai wantaim. Nau planti pipel long Hailans yet i kisim dispela pasin. Ol i lainim long nambis na nau ol nambis bisnisan i salim buai i go long balus.

Long olgeta taun, bikpela samting long olgeta maket, em i no kaikai. Nogat. Em buai tasol. Sampela pipel long taun i save lusim moa olsem tu kina long de bilong baim buai na kambang na daka tasol.

Sampela saveman i bin mekim sampela traim long Yunivesiti bilong Papua Niugini na ol i bin painim olsem, sapos man i kaikai buai long taim bilong draiv, bai i helpim yau na ai bilong em i wok gut.





*Poto antap long lephan i soim wanpela gaden bilong Waso long Wapenamanda long Enga Provins. Ol i save salim ol dispela kabis i kam long Moresby long balus.*

*moa long wok long lum. Na ol samting ol i lumim ol i salim long ol turis.*

*Ol arapela poto i soim sampela yangpela sikman i gat sik lepra long Yampu haus sik, em tu i stap long Enga Provins. Ol i save*

## SAMPELA KAIN SMOLBISNIS



**wantok**  
Niuspela Inisipul ol Papua Niugini

Papua New Guineans' own national weekly in Melanesian Pidgin

**Editorial Office:**  
 Box 1982  
 Boroko  
 Phone : 25.2214  
 Telex : NE 22213

**Branch Offices:**

Box 396  
 Wewak  
 Phone: 86.2479

Box 90  
 Rabaul  
 Phone: 92.1355

Box 111  
 Wabag

**Australian Advertising Representative:**  
 Kevin Engel  
 8 Duraba Pl.  
 Caringbah (2229)  
 Phone: 525.6263

**Subscription rate:**  
 Annual: K8.00



## WOKBOI NA BUAI

Sampela bikpela man long pablik sevis i kirap putim tambu long kaikai buai long ol opis bilong gavman long taim bilong wok. Sampela memba bilong palamen i kirap egensim ol. Olsem na i gat wanpela toktok resis i bin stat. Na bai ol i skruim tok i go moa long neks palamen. Yu wet.

Na ol dispela toktok long kaikai buai, olsem wanem long em?

Sampela man i tok, pasin bilong kaikai buai i ken bringim sik nogut kansa (cancer) long bun bilong maus na wasket. Tasol ol dokta i bekim tok: Yes-sapos yu kaikai planti buai moa, na yu kaikai inap planti yia moa. Tasol smokim sigaret i bringim planti moa kansa.

Ol birua bilong buai i tok olsem: Kaikai buai long taim bilong wok i paulim tingting. Tasol ol saveman tru bilong wok marasin i bekim: Em i no tru. Kaikai buai i kliaim ai na tingting - na bilong dispela tasol planti pablik sevan i yusim. Ol i no laik ai bilong ol i slip.

Ol susok man i sem na i wari long tupela samting: Long repela spet bilong buai i save bagarapim olkain ples na samting. Na tu ol i no laikim repela tit na maus bilong ol pipel i save tanim buai wantaim kambang.

Tasol wokman i save kaikai buai long taim bilong wok, em i no save tanim wantaim daka na kambang. Nogat. Em i kaikai nating; o em i kaikai skin buai tasol. Na tu em i daunim spet bilong en. I wankain olsem ol manmeri i kaikai pike long taim bilong wok.

Wokman nating i kaikai buai long taim bilong wok bikos em i laik kliaim ai bilong em, bai em i ken mekim gutpela wok. Na bosman bilong em, olsem wanem? Yu go lukim tasol hamas bosman long belo i go painim kaikai bilong em, na em i poromanim dispela kaikai wantaim strongpela dring. Em i samting tru bilong pasim ai bilong em taim em i kam bek long wok.

Tasol i no gat tok long dispela samting.



Tupela poto i soim ol man i tren long skul bilong stuakipa long Wewak long pasin bilong ranim gut stua bilong ol. Ol Is Sepik i win tru long dispela.

## ROT BILONG BISNIS

Namba wan tingting bilong mi olsem. Mi laik lukim ol planti moa bisnis bilong ol pipel bilong yumi i kirap. Mi bai wok hat tru long dispela.

Mi no egensim ol bisnis bilong ol ausaitman. Nogat tru. Tasol mi laik lukim ol ausait bisnis kampani i givim planti moa trening long ol pipel bilong yumi long ol bos wok insait long ol bisnis kampani.

Nau ol sampela ausait kampani i no wokim gut ol trening kos long dispela samting. Sampela i giaman. Sampela i hapim. Sampela i les. Na ol sampela i wokim gut moa. Ol ausait bisnis kampani i mas save gut.

Olsem Papua New Guinea i independen pinis.

Ol i stap long kantri bilong yumi. Olsem ol i mas bihainim gut moa ol lo na ol laik bilong yumi. Sapos ol i mekim stret long yumi, orait, yumi bai mekim stret long ol. Sapos ol nogat, orait, yumi tu nogat. Ol ausait bisnis kampani i mas kisim tu ol pipel bilong yumi i kamap memba sea tru. Dispela pasin ol sampela ausait bisnis kampani i mekim long giamanim yumi long memba sea i mas pinis olgeta. Pipel bilong yumi i no ken stap olsem bilas nating long ol

ausait bisnis kampani. Ol i mas kamap memba sea tru. Mi na Dipatmen bilong mi wantaim ol ofisa bilong mi bai i was gut moa long dispela.

### AS TINGTING LONG BISNIS

Nau bai mi autim ol sampela as tingting bilong mi.  
1. Mi laik lukim planti moa pipel, o lain o grup i kamap memba sea insait long ol ausait bisnis kampani. Ol ofisa bilong mi bai i wok strong moa wantaim Developmen Beng long dispela.

2. Mi bai tokim NIDA olsem - taim NIDA i laik orait long ol ausait bisnis kampani i kirapim wok hia long Papua New Guinea, N.I.D.A. i mas tingting gut moa olsem:

(a) Yumi mas kisim i kam insait ol kampani ol bai givim planti wok long ol pipel bilong yumi.

(b) Yumi mas kisim ol ausait kampani ol bai givim planti trening long ol pipel bilong yumi.

(c) Yumi mas tokim ol

long wokim ol samting pipel bilong yumi bai baim na yusim.

(d) Ol ausait bisnis kampani i mas yusim ol kain we bilong wokim ol samting ol pipel bilong yumi i ken yusim tu.

(e) Yumi mas tokim ol ausait bisnis kampani bai ol i mas givim planti moa olkain trening kos long pipel bilong yumi. Dipatmen bilong mi bai wok yet long Laloki Koles long skulim ol pipel bilong yumi long ol pasin bilong wok bisnis.

### LAIKIM NUPELA KAIN BISNIS

Mi laik lukim tu ol planti bisnis bilong yumi long egrikalsa, forestri, na long wokim olkain samting - maski long ol tretstua na ol P.M.V. tasol. Yumi mas kirapim na mekim i kamap bikpela ol wok olsem groim ol sayor, wokim ol kaikai, ronim ol somil, wokim klos, wokim ol liklik bot, sia, tebol na ol samting olsem.

Yumi mas tingting long  
(i go moa long pes 10)



# PAS I KAM LONG OL PIPEL

## PAPINDO?

Dia Edita Mi i gat wari long wanpela kampani nem bilong dispela kampani. Papindo Pty. Ltd., Lae.

Papindo em i mining olsem wanem? Sapos yu husat man o meri wok long dispela Papindo stua.

Bilong wanem, em i save tok. Malay, long ol wantok bilong yumi Papua Niugini wok long Papindo. Tasol mi lukim dispela man i no olsem waitskin?

Pes i luk olsem Saina o Philippino, Japan, ol i wankain tasol. Bilong wanem mi harim mining olsem Papindo. Papua, Indonesia olsem ating?

Bilong wanem ol Wes Irian wantaim ol Indonesia, tupela. Nau tok pait long insait long yumi. Nau olsem na mi pret nogut.

Kwor Waswo,  
Lae.

## PE LONG LIP TI

Dia Edita - Mi laik bekim toktok bilong dispela wantok ya, Mista David Little. Wanpela man long fama long Westen Hailans i save

planim lip ti i bin tok ol PNG i save kisim moa pe antap long ol pipel long arapela kantri em ol i save planim ti na bungim ti ol i save kisim liklik pe.

Na ol PNG i save kisim bikpela mani long wan wan de? Ol i save kisim K1.80 long wan wan de.

Em yu stret tasol mi laik tokim liklik wari bilong yu. Mi laik askim yu. Yes wantok yu bilong Australia o yu bilong PNG? Yu ting dispela mani K1.80 long wan wan de, yu ting em i bikpela mani long wan wik pe? Na fotnait pe i no inap long dispela pe.

Sapos ol leba boi i laik kisim pe long wan wik, mi ting ol inap long kisim olsem K9 long wan wik. Na K18 long fotnait.

Yu ting dispela mani inap long helpim ol marit famili na yu ting em inap long baim kaikai na bilas bilong ol? Na wanem pe bilong tin pis, kembris na ol tabak? Mi lukim prais bilong ol samting i go antap na mi ting dispela K18.00 i no inap.

Ol bai i kisim mani we na bai ol i kirapim kentin na tu bai ol i pasim dispela mani, bai ol i kirap wanem bisnis?



Ating yu no gat tingting bilong yu. Hamas man ol i save kampani long mani. Na hamas man ol i save raskol long mani na ol i save brukim stua na ol i save kilim man nating raun.

Ating yu wanpela memba man o? Sapos yu wanpela Australian, orait, yu mas lusim dispela kantri.

Na sapos yu go long ples bilong yu, husat bai i pasim yu? I no yu wanpela tasol. Planti kandere ol i laikim dispela kain bisnis.

Yu mas putim ia bilong yu long ol memba man tasol a? Yu ting dispela tok bilong yu i daunim? Tenkyu wantok. Sapos yu beol nogut, yu ken raitim pas i go long Wantok Niuspepa. Mi ken save.

Marawa Diamine,  
Madang.

## RETIM KAGO

Dia Edita - Mi laik bringim wari bilong mi i go long Wantok Nius bai wanem brata i gat klia tingting bilong helpim mi. Mi wanpela tisa na mi lukim na harim, klostu olgeta ples long hap bilong Pomio Sab Provinces i sapim diwai na sanapim long namel long ples. Na ol i raitim 10pela lo bilong God long en olsem dispela God i givim long Moses long Maunten Sinai.

Mipela olgeta i no save, tru bikos ol lain manmeri hia ol i save kaikai buai bipo. Nau ol i tambuim buai.

Tu ol i klinim matmat na wokim haus long em ol i

tok haus bilong ol man i dai bikos long Fonde ol i save klinim pis o pik o abus nabaut na putim long haus hia long matmat.

Tupela man i save hait na harim sapos spun i pairap long plet, em ol i tok ol man i dai bipo ol i kaikai na i pinis. Na ol i mekim mak bai ol man i kisim i go. Ol man i kisim kaikai hia na kaikaim. Ol man i save takis tu i go, planti manmeri i no lukluk olsem bipo, ol i luk sik nabaut.

Ol i tok dispela lo bilong ol i kam long wanpela memba bilong Palamen.

Em i bosim hap long Pomio. Dispela pasin i mekim ol man i stap long kibung hia i no pren gut wantaim ol narapela ol i no stap long kibung hia. Ol i no laik wok bisnis, ol i stap nating na ol i tok kago bai i kamap nating i kam long ol sip. Ol i save lukim ol kostel na ovasis sip ol i tok em ol sip bilong ol tru. Ol i mekim hap long Pomio i bagarap bikos planti manmeri na ol kiap, pater bilong ol narapela hap i save long pasin hia.

Tasol i no Pomio long olgeta hap. Nogat. sampela ples tasol. Na em tasol.

Yu wanem wantok bilong Pomio yu stap long wok hia yu gat tok wokim i kam. Sori Pomio ol samting i kamap long hatwok i no long driman.

Em tasol. Tenkyu.

M.P. Charles,  
Pomio/E.N.B.P.

## BUAI I NO ABUS

Dia Edita - Mi laik autim wanpela wari bilong mi nau. O yes planti taim mi yet mi save lukim long ai bilong mi hia long Wewak taun, ol sampela meri i save putim 4-pela buai tasol long maket.

Sori tru ol susa. Mi ken tok olsem. Buai em i no samting bilong kaikai na bel i pulap. Nogat tru.

Buai em i samting bilong mekim maus i ret tasol. I tru kaikai yupela i putim

olsem long maket, em i stret.

Mi save nau em i pinis taim. Olsem na yupela i save putim 4-pela buai tasol. Mi yet mi no amamas.

Dispela em i kranki pasin. Yupela i mas putim samting olsem 7-pela o 8-pela samting em i orait.

Ating em tasol liklik wari bilong mi. Nau yu husat meri yu lukim pas bilong mi na yu belpen tumas, plis, rait tasol i go long Wantok niuspepa na bai mi ken lukim na ritim.

Francis Kohoui,  
Passam/Wewak.

## BUSMAN RAIT LONG WANTOK

Dia Edita - Mi wanpela boi bilong ELC-PNG Tisa Trening Skul. Mi laik autim wanpela wari bilong mi long edita.

Mi harim planti taim long redio na mi lukim long nius. Na planti tok long nius na redio ol i tok long prais bilong olgeta samting long stua i go antap na pe bilong ol wokman bilong gavman tu i go antap.

Em i gutpela. Tasol mipela sampela man i stap long ples, mipela i no inap long baim ol sampela klos i stap long stua. Olsem wanem? Wok bisnis long ples em i liklik long PNG nau?

Olsem wanem na planti bikman i autim dispela tok. Ol samting bilong stua prais i antap. Ol wokman bilong gavman inap long baim gutpela klos long stua. Olsem wanem na prais bilong ol i go antap.

Husat man i laik tok klia long mi, em i gutpela.

Nera Sagi,  
Rintebe/E.H.P.

### WINIM BIKPELA MANI TRU

NAMBA WAN PRAIS	K2,000
NAMBA TU PRAIS	500
NAMBA TRI PRAIS	100

Wan wan tiket i kostim 50t. tasol.

Dispela em i Yakani Association Lottery 2. Provinsal Komisina i tok orait long en pinis. Ol plisman yet bai sambai long taim ol bai pulim nem bilong tripela pipel i win. Em long Sarere, 24 Desemba 1977 long Boroko.

#### Lo bilong dispela loteri :

- 1.) Salim sek o mani oda o postal oda i kam.
- 2.) Salim wanpela skin pas i gat stem na nem bilong yu pinis long en.
- 3.) Salim dispela tiket daunbilo i kam.

Plis salim ..... loteri tiket i kam. Wan wan tiket i kostim 50t. olsem mi salim nau sek inap K..... i kam.

NEM .....

ADRES .....

Nau salim i kam long: **Yakani Association**  
**P.O. Box 166**  
**Port Moresby**

SALIM OL  
PAS I KAM  
LONG :

WANTOK  
BOX 1982  
BOROKO



# NIUS BILONG OL MERI

## Ol Minit Bilong Wes Nu Briten Wimens Kaunsil

Miting i stat long wan klok long Kimbe. Na long dispela miting em long Misis Alup i bin go pas long en long pre.

Long dispela i pinis em long Presiden Mis Lucy Babo i askim menesa bilong Wes Nu Britain Redio Stesin, Mista Samson Patiliu, i bin givim sampela toktok long ol memba bilong W.N.B. Wimens Kaunsil. Em i namba wan tokman.

Narapela man em long Talasea Open Iektoret, em long Mista Gabriel Bakani, i bin givim tu sampela gutpela toktok olsem wok bung wantaim, i mas kirapim kantri na provins bilong yumi.

Bihain ol meri i bin autim ol dispela wari bilong Is na Sentral Nakanai na Hoskins:

### Pe long meri

Ful pe i mas kam long man i givim pikinini long yangpela meri i no marit long en. Tok i kamap na Mista J. Lewis, Welfe Ofisa bilong Is na Sentral Nakanai i tok strong olsem.

### Transpot

Insait long dispela miting mipela i tok tu long transpot bilong kisim ol meri long wanem hap sapos ol i laik go long en. Sapos yupela i laik kam kamap long atendim miting o kamap long pilaim hia long Kimbe taun, yupela i mas redim sampela mani pastaim.

### Hostel

Narapela samting mipela i toktok long en long kirapim wanpela komyuniti hostel long Kimbe taun.

Long bekim bilong dispela toktok em long Presiden, Mis Lucy Babo i klaim toktok olsem. Em i filim na salim wanpela fom bilong askim long hap graun long sanapim dispela



*Pater Knorr i potoim dispela Simbu meri long taim ol lain i stretim tok bilong marit na baim meri.*

haus. Tasol bekim bilong pepa bilong em i no kam yet. Sapos tok orait bilong pepa bilong em i kam bek orait, em bai tokaut long en long narapela miting.

Em hia sampela moa minit bilong miting:

### We bilong painim mani

Misis Waka i bin tokaut olsem sapos yumi i laik painim mani bilong helpim Wimens Kaunsil em wanpela we em long wan wan klap i mas kolektim mani na helpim i go long WNB Wimens Kaunsil. Tok strong i kam long Misis Monika long sapotim toktok bilong Misis Waka.

Minit i klos na Misis Cathrine Gabu i muvim mosen na seken long Misis Louis em Welfe Ofisa bilong Is na Sentral Nakanai. Misis Louis i tok strong long Seketeri long salim minits na sekiula i mas go aut long sampela grup o klap long rausim mani bilong helpim WNB Wimens

Kaunsil. Misis Louis i muvim mosen, seken long Misis Rupa.

### Kirapim Kimbe taun i klin

Misis Alup i tok olsem bai i ken sapos Presiden i

ken go na askim P.C. bai yumi ken go wokabaut raun long taun na mumutim pipia sapos i gat liklik pe long en. Tasol toktok i no stret bikos Presiden i ting olsem em taun bilong yumi na ating sapos yumi wokim dispela wok bai i gat pe long en. Olsem na dispela minit bai i bringim i go long Eria Atoriti Ofis bilong narapela miting long bihaintaim.

Narapela minit em long Misis Alup i ken tok long en, em long man i putim nating rabis bilong em long rot (olsem man i pispis long rot sapos em i spak). Em i tok olsem sapos i orait long Eria Atoriti bai i mas gat pablik toilet hia long Kimbe taun. Strongpela givim tok i kam long Petra bai i mas gat pablik toilet insait long taun. Dispela minit mipela olgeta meri bilong Wimens Kaunsil i strongim na putim bung tokwantaim bai i mas gat pablik toilet. Petra gen muvim mosen, seken long Clotilda. Mosen i pas.

### Welfe Ofisa i mas stap hia long Kimbe


Misis Ritako i bin givim

strongpela toktok i go long ol meri olsem. Sapos ol i ken tok orait bai Welfe Ofisa bilong yumi em long Misis Stephani bai i mas kam stap hia long Kimbe. Bikos long lukluk bilong mipela kamap na mipela i laik stretim wari tasol Welfe i stap longwe. Olsem na mipela i putim tok wantaim olsem ol bos bilong em ol i ken orait long tok bilong mipela.

Sapos inap na i ken long Welfe Ofisa i mas lusim Talasea na i kam stap long Kimbe.


Tok save i go long ol klap grup o Wimens Felo-sip hia long taun na long narapela hap bilong Wes Nu Briten olsem:

Sapos yu laik kamap memba bilong WNB Wimens Kaunsil, yu mas givim fi olsem K10.00 long wanpela klap o grup. Long lukluk bilong mi long las miting bilong yumi i no gat tru klap o grup i ful memba bilong Asosiesen. Olsem na mi putim strong tok olsem, sapos yu laik kamap memba tru bilong W.N.B. Wimens Kaunsil, yu mas baim fi olsem K10.



**PREN BILONG YU INAP OLTAIM**

# SOLOMON AILANS WINIM



Ol Solomon Ailan i klostu long Papua Niugini na i wankain pipel tru long mipela, nau i kamap long independens bilong em. Ol ailan ya i gat 200,000 pipel na ol bai kisim independens long Julai 1978. Ol bai kamap namba 37 memba bilong Komonwelt na bai votim Kwin Elisabet het tru bilong gavman bilong ol, olsem PNG i bin mekim.

Praim Minista James Calloghan bilong Englan na namba wan minista bilong Solomons, Mista Peter Kenilorea wantaim 25 memba bilong gavman bilong em i pasim tok pinis long biktaun London. Lida bilong oposisen, em Bartholomew Ulufa'alu i no bin go wantaim. Em i no laik.

Kenilorea i gat 34 krismas na em i bin winim ileksen long Jun 1976. Em i pikinini bilong wangepela misineri. Em i bin skul

## TOYOTA

**TOYOTA TRAK.  
TUPELA KAIN...  
SOTPELA NA  
LONGPELA**

**TUPELA WANTAIM I NAMBA-  
WAN LONG KARIM KAGO,  
PASINDIA, NA RAUN-RAUN  
TU !**



**ELA MOTORS LIMITED**

PORT MORESBY  
P.O. Box 75  
Tel 25 4088

LAE  
P.O. Box 91  
Tel 42 1568

RABAUL  
P.O. Box 712  
Tel 92 1988

KIETA  
P.O. Box 468  
Tel 95 6083

MADANG  
P.O. Box 110  
Tel 82 2188

MT. HAGEN  
P.O. Box 93  
Tel 52 1888

WEWAK  
P.O. Box 581  
Tel 86 2255

# INDEPENDENS

long Nu Silan na i bin tren long tisa.

## SITISENSIP WARI

Bikpela wari bilong ol Solomon Ailan em long 2,700 Gilbert Ailans pipel i bin kam insait long Solomons bihain long woa na i anka i stap. Ol Englan yet i bin grisim ol long kam, long wanem ol i pret i gat planti pipel tumas long ol liklik ailan bilong ol. As ples bilong ol i longwe inap 1,100 mail long Solomons. Na ol i narakain pipel; skin bilong ol i wait liklik. Olsem na ol lokal Solomon Ailans pipel i bel nogut long ol na i laik tambu bai ol i no ken baim graun bihain long ol i kamap sitisen.

Tasol Englan i no laikim dispela kain tingting long wanem em i min bai gat tupela kain sitisen: sitisen tru na hapkas samting. Na Yunaitet Nesens tu i egens long dispela kain aidia. Nau ol i laik putim ol waitman na ol Gilbert Ailans long wanpela klas tasol. I no klia yet bai ol dispela kain nupela sitisen i karamap long wankain lo tru olsem ol lokal pipel o nogat.

Ol lokal pipel bilong Solomons i pret long ol waitman, long wanem ol i gat bikpela plantesen na bisnis na mani na save long mekim wok bisnis. Na sapos ol i kamap sitisen wankain olsem ol lokal pipel, bai ol i winim ol. Nau lo i tok olsem: ol i ken aplai bilong kamap sitisen long

nupela independen kantri. Sapos ol i kisim tok orait, bai ol i kamap sitisen long de bilong independens. Tasol i no klia yet, olgeta nupela sitisen i wankain long ol lokal pipel o nogat. Ol bai i gat wanem kain rait? Ol i ken baim graun? Ol i ken ranim bisnis o nogat? Em i no klia yet.

## GAVMAN

Ol Solomons i no save yet ol i laikim wanem kain gavman. Asembli bilong ol i laik bai ol i votim Kwin em i het bilong gavman bilong nau, na bihain bai ol i kamap repablik. Em i olsem, ol bai gat sampela stet o provins i bung wantaim olsem long Australia.

Ol i no gat sampela politikal pati olsem long Papua Niugini. Klostu olgeta memba bilong asembli bilong ol i independen memba.

Taim ol Solomons i kisim independens, bai Englan i givim samting olsem K50 milion kina long ol insait long 4 yia. Bai ol i kisim narapela K40 milion olsem helpim long olkain wok.

Wok bisnis long Solomon Ailans i no strong. Ol i save salim sampela timba na kopra na pis. Em tasol. Bus i karamapim klostu olgeta ailan bilong ol yet. Ol i wok long painim kopa na samting olsem aninit long graun.

## STORI BILONG KANTRI

Stori bilong ol Solomon

Ailan i go olsem. Namba wan waitman i lukim ol dispela ailan em wanpela man bilong kantri Spen, Nem bilong em Alvaro de Mendana na em i kamap long yia 1567. Tasol ol ausaitman i lusim ting long ol dispela ailan inap long 300 yia.


Ol pipel bilong Solomon Ailan i man bilong pait moa yet. Englan i kam insait na kisim ol dispela ailan long yia 1893 bilong stapim ol pait namel long ol lokal pipel. Na tu em i no laik bai Jemani i bosim ol. Tasol inap long 1945 Englan i no bin mekim sampela wok bilong developim ol dispela ailan na bisnis na pipel bilong en. Nogat.

Long taim bilong woa Solomon Ailans i gat bikpela namba long ai bilong ol Japan na ol Amerika. Wanpela bikpela pait tru i kamap long ailan Guadalcanal.

Bihain long woa i gat wanpela strongpela grup pipel i kirap wokim wanpela kain koprativ wok na ol i no laik tru long baim takis long gavman bilong Englan. Dispela samting ol i kolim "Marching Rule" - rul bilong wokabaut mas. Gavman i kalabusim sampela lida bilong en. Tasol bihain em i givim bikpela pawa moa long han bilong ol lokal gavman kaunsil na olsem em i mekim i dai tok na kros.

## PLANTI KAIN PIPEL

Tude Solomon Ailans i kantri bilong planti yang-



Peter Kenilorea, Namba Wan Minista

pela pipel. Moa olsem wan hap bilong ol i no gat 18 krismas yet. Insait long ten yia, ol i bin dabolim namba pipel bilong ol. Klostu olgeta Solomon pipel i bilong lain i gat braunpela skin olsem ol Papua Niugini - em ol i kolim ol Melanesia.

Samting olsem 6,000 i bilong Polynesia - em i long hap sankamap long biksolwara Pasifik, olsem bilong Tonga na Tahiti na ples olsem. Na dispela 2,700 bilong Gilbert Ailans em ol i kolim Maikronesia - em ol ailan long not na ol dispela pipel i gat blut bilong Japan na Saina insait long ol. Ol i waitskin liklik.

Long Solomon Ailans i gat 80 kain kain tok ples. Tok Inglis em i tok bilong gavman wantaim ol arapela kantri. Tasol tok Pisin - wankain long tok Pisin bilong PNG - em i tok namel long ol pipel. Samting olsem 90 pesen bilong ol pipel i Kristen.

Ol Solomon Ailan i bin kisim nem bilong ol long pikinini bilong King Devit bilong Olpela Testamen. King Solomon i gat planti gol moa, na ol waitman bipo i raun long painim gol. Ol i bin tin dispela ol ailan i gat planti gol olsem na ol i givim nem Solomon Ailan long ol

## TOBA PTY. LTD.

Lae, Port Moresby

CANTER

TIPPER

T120 MINIBUS

T120 UTILITY



LANCER

MINICA

CELESTE

SIGMA

OL I HETMAN BILONG SALIM OL MITSUBISHI KA

# PAS I KAM LONG OL PIPEL

## MEMBA YU GAT TUPELA ILEKTORRET

Dia Edita - Mi wanpela man bilong Saussia Kaunsil eria. Tasol nau mi stap long Lae long Morobe Provinces. Olsem mi gat wanpela wari tru long hap bilong mi em long Saussia eria. Olsem na mi laikim Wantok i prinim dispela tok bilong mi insait long niuspepa.

Mi laik mekim sampela toktok long Nesenel Ilesen bilong yumi i kamap long dispela yia. Olsem yumi olgeta pipel bilong Yangoru Saussia Open Iektoret i makim wanpela man olsem memba o makim maus bilong yumi olgeta pipel bilong Yangoru na Saussia long Nesenel Palamen long Pot Moresby long harim wari bilong yumi olgeta pipel na bringim i go long gavman long em i ken save na helpim hap bilong yumi liklik long gohet long ol kain wok.

Bipo tru taim Yangoru na Saussia i kamap olsem wanpela ilektoret, na ol pipel i makim ol memba long sanap long nesenel palamen, ol dispela lain memba i no mekim wanpela gutpela wok long dispela hap long kirapim ples i go het na helpim liklik sindaun bilong ol pipel. Na mipela olgeta pipel i ken tok tru antap olsem, i no gat wanpela gutpela wok wanpela bilong ol dispela memba ol pipel i makim i bin bringim wanpela gutpela wok insait long hap bilong ol.

Ol dispela memba stat long Beibi Yambanda, Mathias Yaliwan, na Linus Hepau. Olgeta dispela memba i no bin mekim wanpela gutpela wok tru long helpim olgeta pipel long hap bilong ol. Ol i tingting long baim planti ka na wokim bikpela bisnis bilong ol na slip tasol long gutpela sia insait long nesenel palamen na kisim mani nating long pulimapim poket bilong ol na ol i no tingting long tarangu ol pipel i bin votim ol long taim bilong ileksen long

sanap olsem maus bilong olgeta pipel long palamen.

Mi no save harim liklik toktok bilong wanpela memba bilong dispela hap i kamap long niuspepa o redio long helpim ol pipel bilong en na tu long hap bilong ilektoret i go het liklik. Na mi tok tru olsem nogat tru olgeta.

I luk olsem Yangoru stesin i kamap gutpela tru. Tasol Kubalia, klostu bai i no gat stesin olgeta. Na olsem bus bai i kamap na karamapim stesin na olgeta wok bilong gavman. Olsem skul, haus sik, plis, wok didiman, na ol arapela wok bai pinis olgeta.

Na dispela hap bai i stap ken olsem na welman olsem ol tumbuna bipo, i no save lukim ol waitman. Na tu olgeta wok bilong developmen long dispela hap bai i go lus olgeta.

Olsem na mipela olgeta pipel bilong Saussia eria i tok maski long mekim pasin bilong wantok sistem na kirapim Yangoru tasol i go het na hap bilong Saussia i no gat. Olsem mipela olgeta pipel bilong Saussia eria i askim dispela nupela memba bilong Yangoru Saussia long helpim tupela hap wantaim na maski long Yangoru tasol.

Olsem ol arapela memba bilong bipo i save mekim na tu mipela olgeta pipel bilong Saussia eria i laikim olsem nupela memba bilong yumi. Sapos yu no gat wok long palamen, yu mas raun long tupela hap wantaim na kisim wari bilong ol pipel bilong yu na

bringim i go long han bilong gavman.

Na maski long go raun tasol long Yangoru na i no go raun na lukim ol pipel bilong Saussia eria na harim ol wari bilong ol na traim long helpim ol. Ol pipel long eria bilong yu i tok na yu kamap olsem memba long nesenel palamen.

Na sapos ol pipel i no vot long yu, yu ting bai yu kamap memba nating? Nating bai yu sori ya. Olsem maski long givim baksait long ol pipel bilong yu na yu yet yu amamas long ol gutpela samting na ol pipel i sori, wari na krai i stap.

Nating em tasol ol wari bilong ol pipel bilong hap bilong mi na mi tu wantaim. Na husat i laik skruim toktok bilong mi, em i welkam tasol na bai mi amamas tasol long ritim long Wantok Niuspepa. Tenkyu tru Wantok long prinim ol dispela toktok bilong mi.

Stephen Simon Jerry,  
Bumbu/Lae.

## DAUNIM PRAIS NA WINIM STIL PROFIT

Dia Edita - Mi bin lukim wanpela pasin i no stret long ai bilong mi em ol hailans man ol i bin mekim long Namasu Wof long Lae.

Long namba 29 de bilong mun Ogas, mi bin kisim M.V. Totol na mi kam kamap long Lae long moningtaim tru long Tunde. Em ol sampela man bilong

ketim buai long Lae na mipela i kam wantaim.

Na long moning mipela i kamap long Lae na mipela i lukluk i go long hap bilong bris, na planti P.M.V. stat ol i kam wet pinis long bris. Em ol draiva na pasindia bilong Hailans yet ol i laik baim buai na ol i kam wet i stap.

Na ol wokman bilong sip i opim dua na mipela i go ausait. Na mipela i no abrisim get bilong bris yet na ol draiva na pasindia bilong hailans ol i kam insait long get na askim ol man long ol i laik salim buai long maket.

Na mi lukim wanpela man bilong hailans em i kam askim long pe bilong buai bilong wanpela man.

Na dispela man ol bikpela bikpela bek buai bilong em, em i kostim K40 na liklik em i kostim K25.

Na mi lukim dispela man bilong hailans em i toktok strong long daunim prais bilong bek buai bilong man bilong Finschhafen.

Na tupela i toktok yet i go na dispela hailans man em i kisim 3-pela bek buai bilong dispela man bilong Finschhafen. Na wan wan bek buai em i kostim K40 kina.

Tasol dispela hailans man em i givim K86 tasol long papa bilong buai. Na K80 em i bilong tupela bek buai, em i stret. Tasol wanpela pe bilong em i K6 tasol. Mi lukim dispela pa-

sin em i nogut tru. Em i pasin bilong stil stret.

Na bek buai bilong dispela man tasol bilong K25 em ol sampela man i kam baim long K20 tasol. Em ol hailans man tasol i mekim.

Ol brata long hailans. Sapos yu i go long tret stua, o bikpela stua insait long taun o aut stesin, na yu laik baim wanpela samting na yu askim stuakipa long hamas prais bilong en.

Na dispela samting yu laik baim long en, em prais bilong em i go antap tumas. Na yu inap toktok strong wantaim stuakipa o menesa bilong dispela stua long daunim prais bilong dispela samting yu laik baim long en? Nogat tru. Plis displea em i wankain tasol long ol arapela brata i laik salim kaikai o buai o wanem kain samting em i laik salim long maket. Mi lukim dispela pasin em i no stret tru.

Dispela pasin em yu givim sori na belhat man long husat man i laik salim samting long maket. Olsem na plis ol hailans. Bihain yupela i no ken i go baim buai long nambis.

Mi ken tok sori tru long mi kolim biknem hailans. Tasol dispela pasin em ol Hagen man tasol i save mekim. Mi save i go long Hagen taun maket na mi save lukim 2-pela buai em ol i save putim bilong 10 toea.

Wanpela buai sapos em i bikpela liklik, orait em bai ol i putim wanpela tasol bilong 10 toea na kisim moa profit.

Dispela pasin em i nogut tru. Sapos yu husat man o meri bilong Hagen yu lukim dispela tok bilong mi na yu belhat o mekim wanem, rait i go long Wantok. Em tasol.

Harry Tokey,  
Kitip/W.H.P.

## TOKSAVE LONG OL AUSAIT WOKMAN

Long 1975 gavman i bin statim wanpela nupela entri permit pasin na i givim tok orait long olgeta ausait manmeri i wok insait long Papua Niugini long stap inap tu yia, em i min inap Desemba 1977. Permit bilong ol i laik pinis nau.

Nogut planti i wet long Desemba yet na i karamapim "Migration Office". Ol i mas aplai NAU. Na bikpela samting, ol i mas gat wanpela pepa long Leba Dipatmen i tok orait long ol i ken holim yet wok bilong ol. Sapos yu no gat dispela, yu no inap kisim "re-entry permit". Long dispela, yu rait nau i go long:

Employment and Training Branch  
Ministry of Labour  
P.O. Box 5644  
Boroko

SALIM OL  
PAS I KAM  
LONG:

WANTOK  
BOX 1982  
BOROKO



# MAUNTEN MUL I AS BILONG LAIP

## STORI BILONG TUMBUNA

Bipo tru i no gat man long graun. Olsem na i gat kain kain pisin i go i kam long Is na Wes bilong olgeta de na nait. Ol i save pilai raun i go kisim win long dispela maunten Mul.

Dispela Mul em i tok ples Hagen. Ol i minim olsem: Em i nupela kru i gro o sit i bruk i go na kamap pikinini kaikai. Olsem long dispela maunten Mul, ol manmeri i stat long kamap o gro long en.

Maunten Mul em i as laip bilong olgeta manmeri na planti manmeri moa i kamap long dispela Mul. Na sampela ol i go long hap bilong Enga Provins. Na sampela ol i bihainim wara Naiviler i go kamap olgeta long Sauten Hailans Provins na sampela ol i go olgeta long hap bilong Papua.

Na sampela ol i go antap long wara i go kamap long Banz, Bendwagi, na i go olgeta long olgeta hap bilong nambis. Na sampela i stap yet long Maunten Mul. Ol i laik i go long arapela hap bilong ol i laik slip. Orait, olgeta i kisim graun antap bilong Maunten Mul, long wanem em i save givim laip long ol man.

Olsem ol i kisim gutpela graun i kam na lusim long olgeta graun bilong yumi P.N.G. Nau long Maun Mul i kam inap long Tambul na Tomba, mipela i save i gat ais na i kol.

Long wanem long antap gutpela graun long en, olgeta man i kisim i go daun-bilo long arapela hap bilong PNG. Olsem na nau Tomba na Tambul i gat ais na i kol. Long taim bilong san, ol i save go raun long dispela ples Mul na ol i save painim abus na ol i go kukim.

Man naispela haus man i stap na gutpela as tanget i stap raunim dispela haus



man. Na ples i naispela tru na klin i tru. Nau ol man i go lukim dispela maunten Mul.

Tasol ol i no ken opim maus o toktok. Ol bai i harim tasol na i stap. Ol manmeri i toktok na dok tu i krai long arapela hap. Tasol ol i no inap long lukim. Sapos wanpela man i lukim dispela samting bai em indai.

Olsem bipo long dispela taim man tasol i brukim bus na lusim Mul na i kamap long Minimb na Keltiga, na stret long Hagen taun. Na bihain long Mul na em i slip long dispela hap.

Na em i karim 4-pela pikinini man. Wanpela em i kolim Nining na arapela em i Mul Timb. Orait,

Nining i kamap long arapela sait bilong maunten i go kamap long Ningan.

Olsem na bihain ol tumbuna i kamap long en. Ol i oraitim dispela ples i stap yet. Long ai bilong mi, mi lukim dispela hap. Arapela brata i go long sait bilong maunten na em i mekim olsem tu. Wokim gaden, na haus slip long naispela ples.

Dispela man Nining i lusim haus bilong en na i kam wantaim wanpela kain diwai ol i kolim Kerakapiapul. Em i kisim i kam na planim long Arowa, long Naviler. Na nau, diwai i stap yet long dispela hap Arowa.

Dispela man Nining i karim wanpela pikinini man. Na em i koiim em Naminga. Tumbuna 1, tumbuna 2, na tumbuna 3, Awil. Awil na brata Kamugil 4. Merua na papa 5, em ol i Abura na Duwa na Oga.

Dispela ol i lapun papa. Nau ol i stap yet. Tumbuna 5, nau ol i lain papa

na brata i stap nau long hap bilong Naiviler veli na mi stap long en, wantaim ol.

Nau haus bilong Timb, ol papa i wokim o klinim

dispela hap ples bilong Mul Timb.

John Kulda,  
Maun Hagen.



P.O. Box 615

LAE

Ring: 42.4200

Kampani bilong yumi



NAMBAWAN TIN PIS

TERRITORY NET SUPPLIES  
Box 5860, Boroko, Tel. 25.6700

Namba wan ples bilong baim olkain samting bilong wokim umben: string, rop, twain, let, flot, nil bilong samap.

Rait na askim mipela long prais bilong ol.

## I PAS STRET LONG MINIT

Bernard Kawan

Yes, tupela wantok!

UPNG

Yu bilong we?

"Mi bilong New Guinea."

Na yu?

"Mi bilong Papua"

Na yutupela wantaim?

"Bilong Papua New Guinea."

Sori tumas tupela wantok!

"Mi no laikim nem New Guinea."

"Mi no laikim nem Papua"

"Mi no laikim tu nem Papua New Guinea.."

Mi laikim tru wanpela nem tasol.

Yes, tupela wantok.

Wanem tru?

New Guinea Hmm! Hmm! No!!!

Papua. Hmm! Hmm! No!!!

Papua New Guinea. Hmm! Hmm! No!!!

Na wanem nem tru?

O! Yes, Mi tingim, Mi tingim!!!

Na mi tu tingim, tingim!!!

Wanem? Wanem?

Tupela!!

NIUGINI..... Laka!!

Emmmmm. .... Nau .... Yu tupela wantaim!!!

I PAS STRET LONG MINIT.

## Rot bilong bisnis

( i kam long pes 3 )

helpim moa ol dispela kain wok bisnis i save helpim ol pipel i stap ausait long ol taun olsem ol fid mil, ol masin woksap, ol woksap bilong wokim ol tul, ol woksap bilong stretim ol ka, trak autbot mota na ol samting olsem. Mi bai kirapim kempen long skulim ol pipel long baim ol dispela samting yumi yet save wokim - olsem "Yumi yet mas baim ol samting yumi yet i bin wokim".

Mi laik lukim ol tarif na ol selstakis long ol samting i kam long ol arapela kantri sapos yumi yet save wokim ol dispela samting hia long Papua New Guinea olsem bia, strongpela dring, smok, sia, tebol na ol samting olsem. Sapos yumi mekim olsem, orait, dispela samting yumi save wokim bai no ken dia tumas olsem samting i kam long arapela kantri.

I olsem - sapos yumi wokim sia o tebol, orait, yumi putim takis long sia o tebol bilong arapela kantri bai sia o tebol bilong ol i dia na bilong yumi nogat.

Olsem ol pipel bilong yumi bai i go baim sia o tebol yumi yet wokim. Mi laik lukim dispela pasin i kirap planti moa.

### PLANTI MOA

Dispela pasin bai helpim ol bisnis bilong yumi.

Mi no laik lukim ol wok bisnis i stap long Port Moresby na Lae tasol. Nogat. Mi laik bai i gat wok bisnis long ol biktaun bilong ol wan wan Provins na ausait long ol taun wantaim. I olsem mi no laik lukim olsem wanpela draipela faktori bilong simen i kirap long wanpela hap tasol. Sapos i inap, orait, i mobeta sapos i gat tu, tri o foa faktori bilong simen i stap long tu, tri o foa hap bilong Papua New Guinea. Olsem bai yumi katim daun ol transpot kos na kirapim bisnis long simen long tu, tri o foa ples na long wanpela hap tasol bai nogat.

### SAMPELA NUPELA AIDIA

Mi laik go lukim, wan-

taim sampela ofisa bilong mi wantaim ol sampela bisnisman bilong yumi ol kantri i gat ol liklik viles industri olsem yumi yet - ol kantri olsem Saina, India, Korea, Afrika we ol ples na sosaiti na ol kain wari na ol problem olsem yumi yet. Yumi no ken bihainim tasol ol bikpela kantri olsem Australia, Amerika, Englan o Japan. Ol i arakain olgeta long yumi.


Bilong mekim ol dispela wok bilong helpim ol pipel bilong yumi Dipatmen bilong mi i mas i gat mani. Em i nogut yumi mauswara nating tasol. I gat ol planti samting yumi baim yet long ol arapela kantri - tasol yumi yet inap long groim o wokim. Orait, maski wet - yumi stat wok nau. Mi les pinis long ol planti toktok long "self-reliance". Mi yet laik lukim long ai bilong mi - yumi olgeta i pilim olsem, laka?



## BOROKO MOTORS



Tractors  
Equipment



YU KEN LUKIM NUPELA FORD TRAKTA  
LONG BOROKO MOTORS LONG OLGETA

HAP BILONG PAPUA NIUGINI na tu  
long ARAWA MOTORS.



EM I WINIM OLGETA ARAPELA TRAKTA  
INSAIT LONG PAPUA NIUGINI

\*\*\*\*\* PLANTI SPEA PAT

\*\*\*\*\* PLANTI MEKANIK

# Korobosea Komyuniti Senta

Christopher Saulo i raitim stori na kisim na wasim ol poto.



Kirap long lephan em Frank Ginete, seketeri bilong senta, Gureki Degure, siaman, Fred Nuana, spika, na Waibua Garia, viles kaunsila.

Long 24 de bilong mun Septemba, Memba bilong Moresby Not Is, na Lord Mayor bilong Port Moresby Siti Kaunsil, Mista Mahuru Rarua Rarua, i bin opim nupela komyuniti senta bilong Korobosea viles.

Mista Rarua Rarua i tok, em i amamas tru long lukim liklik viles olsem Korobosea i gat komyuniti senta bilong en yet. Na tu em i tok, dispela senta i no bilong sanap nating. Nogat. Em i bilong helpim ol pipel long kamapim planti gutpela samting long viles bilong ol yet. Olkain samting olsem, helpim na skulim ol pikinini i lusim skul o ol dropout long lainim wok olsem kamda na planti arapela samting tu.

Long pinisim toktok bi-

long em, em i tok, ol pipel na ol komiti memba bilong dispela senta i mas lukautim gut. Ol i no mas mekim nabaut na brukim olgeta samting insait long en. Long wanem komyuniti senta ya nau i stap long han bilong ol pipel bilong Korobosea yet. Na i no long han bilong ol siti kaunsil.

Sapos ol i mekim nabaut na i no tingting long lukautim komyuniti senta, bai ol i lus olgeta. Siti kaunsil i no inap long peim ol kos bilong lektrik na kos bilong wara. Em i samting bilong ol pipel na komiti memba long mekim dispela samting.

Siaman bilong Wod 5 kaunsil, Mista Brian Bell, tu i bin tok, ol pipel i mas wok wantaim long mekim komyuniti senta bilong ol i

go het gut. Ol i mas traim long mekim ol pilai na tu soim piksa long kisim mani bilong mekim ol arapela wok ol i gat laik long en. Siti kaunsil yet i bin lusim moa long K15,000 olgeta long wokim dispela senta, olsem na ol i mas lukautim gut.

Lida bilong Korobosea Womens Felosip, Misis Hazel Boseto, tu i tok, em wantaim ol memba meri i amamas tru long lukim komyuniti bilong ol yet.

Siaman bilong Korobosea Komyuniti Senta, Mista Gureki Degure, i bin amamas tru long dispela bikpela de. Na tu em i tok Korobosea i no bikpela viles, na i gat olsem 350 pipel, tasol nau ol i gat hol bilong ol yet.

Bihain long dispela bung, Mista Degure i bin askim

hetman bilong Yunaitet Sios, Pasto Leslie Boseto long mekim liklik beten. Na bihain Mista Rarua Rarua i bin katim tep na opim dua bilong komyuniti senta.

Ol man na meri bilong Korobosea i bin mekim ol profet singsing long soim olsem ol i amamas tru long wanem komyuniti bilong ol nau i op pinis. Ol liklik skul sumatin bilong Korobosea Yunaitet Yut Felosip tu i bin singim kwaia singsing bilong ol longtaim Mista Rarua Rarua i katim tep long opim hol. Lida bilong Yut Felosip Mista Madaha Geita yet i bin go pas long ol.

Ol pipel yet i bin kukim planti kaikai tru, olsem olgeta ausaitman na pipel bilong Korobosea i bin bung wantaim long kaikai. Brigidia Jeneral Ted Diro, yet i bin katim welkam kek bilong Korobosea Komyuniti Senta,

Poto daunbilo i soim kwaia bilong yut felosip bilong Korobosea ol i bin singim sampela song long de Senta i op.



## TULTUL TITAN


SAPOS YU NOGAT BANIS OL STILMAN BAI I GO BRUKIM HAUS NA STIL PINIS BAI OL I RON AWE.....

KISIM TITAN GEN WAIA MES NA WOKIM BANIS NAU. EM I KEN HELPIM YU HOLIMPAS IM OL SAMPELA.

Titan (NG) Pty Ltd. P.O. Box 25 Lae Ph 423988, 423497

# PEARSON VETUNA

Mis Euralia Paine i raitim stori.



Poto i soim Pearson Vetuna insait long studio bilong NBC long Port Moresby.

Wanpela samting Pearson Vetuna i laikim tru, em long sindaun harim ol toktok bilong ol bikman bilong politik long redio. Em i amamas long harim pasin bilong toktok bilong ol bikman bilong politik long redio. Em i amamas long harim pasin bilong toktok bilong ol.

Em i ting ol man bilong politik i save mekim gutpela toktok tru, em Sir John Guise na Barry Hollowei. Pearson i tok: tupela spika ya i save toktok klia tru na i isi long harim toktok na nek bilong tupela. Em i laik harim tu redio toktok bilong Josephine Abaijah na Michael Somare.

Pearson Vetuna em i wanpela redio anaunsa bilong NBC na mama i bin karim em long taim bilong woa, long yia 1944 long viles Baai klostu long Rabaul. Em i namba wan bilong 3-pela susa na 5-pela brata moa. Papa bilong em i pasto bilong Yunaitet Sios, tasol long 1974 em is sevis long dispela wok na i bin kamap bisnisman. Inap nau tasol em i save bosim lotu na kain wok olsem long ol viles.

Pearson i winim praimeru skul long Gazelle. Na long 1958 em i go long Vunamami Rural Skul we ol i skul long wok didiman na wok gaden na olkain wok olsem long vokesenel skul.

Em i tingting i go bek long dispela kain skul na em i laikim tumas na i ting dispela em i gutpela kain skul bilong tude tu. Em i skulim ol sumatin long sanap long lek bilong ol yet, long helpim ol yet, na long sindaun gut wantaim na wok gut wantaim ol arapela pipel. Sapos ol i no inap go long haiskul, maski, tasol ol i bin kisim save long planti kain samting inap long helpim laip bilong ol.

Bihain long dispela skul em i go long Keravat Haiskul. Na long pinis bilong 1962 Pearson i winim Nu Saut Wels Intermediet Setifiket. Na bihain long tupela yia moa em i winim Living Setifiket bilong Nu Saut Wels.

Long 1966 em i go tren long Port Moresby Tisa Koles. Em i statim wok tis bilong em long Taurama pri-skul. Nau em i joinim ABC olsem wanpela tanim tok bilong tok Pisin. Bihain em i tren long anaunsa olsem nau em i stap long NBC, Em i bin go sampela taim long Australia long kisim kain kain trening long brotkas.


Mista Vetuna i laikim wok bilong em, tasol em i ting long traim sampela kain bisnis bilong em stret. Olsem em i ting long pinistaim long NBC, long wanem em i bin brotkas inap 11 yia nau.

Pearson Vetuna i marit na i gat tupela pikinini.

## SAPOS YU LAIKIM BATERI TRU YU BAIM DISPELA KAIN


### KASET BILONG MAXELL

Em i namba wan tru



### BATERI BILONG MAXELL

Em i save wok longpela taim tru



yu ken baim long :

HAGEMAYER (P.N.G.) PTY. LTD.

P.O. Box 673, MADANG  
PHONE: 822445

P.O. Box 1428, BOROKO  
PHONE: 256144

P.O. Box 63, RABAUL  
PHONE: 922633

P.O. Box 90, LAE  
PHONE: 423200

P.O. Box 11, MT' HAGEN

# TROMOIM I GO LONG HUL WARA

(Jenesis 35: 27-29. 37: 1 - 26.)



Jekop i haitim ai na i lukluk i go long biktaun Hibron...

Em i taun bilong lapun papa Aisak?

Yesa, em tasol. Tasol em i lapun tru na nogut mipela i bin kamap bihain tumas.

God i harim pre bilong Jekop. Em i painim papa bilong em i aipas pinis na lapun tru

Jekop i amamas long soim 12-pela pikinini man long papa Aisak

Papa, mi Jekop pikinini bilong yu.

Jekop pikinini bilong mi. Mi beten planti taim long helpim yu. Yu gat sampela pikinini o nogat?

Papa, em tupela i Josep na Bensamin, tupela pikinini bilong Resel.

Stap gut, yutupela na harim gut tok bilong God.



Bihain Aisak i dai, Jekop i kirap bosim famili na lain. Iso i kam tu na i helpim Jekop long planim papa. Bihain Iso i go bek long ples na Jekop i bungim ol pikinini bilong em.

Hia i no gat inap gras long ol sipsip. Mipela bai bringim sampela i go long ples Sekem.

Mi ken go wantaim ol brata?

Nogat, Josep. Yu stap. Mi gat wanpela samting long givim yu.



Papa i laikim Josep tumas.

Em i mekim oltaim olsem tasol. Ating nau em i skulim em long bosim mipela.

Em i no inap long bosim mi.

Bihain ol brata i go pinis

Hia, Josep... em wanpela nupela saket papa i tokim mipela long wokim bilong yu

Bilong mi. Man, em i smat moa.



Taim ol brata i kam bek ol i jeles long Josep. Nau em i kirap stori long ol driman bilong em.

Long nait mi draim mipela i pasim mekpas wit. Mekpas bilong mi i sanap na bilong yupela i nildaun onaim em.


Nildaun long em? Nogat tru tru



Bihain gen Josep i gat narapela driman.

Mi draiman olsem san na mun i onaim mi.

Wanem? Bai mipela aninit long yu?



Jekop i lusim ting long dispela driman bilong Josep. Tasol brata i belhat tru tru.



Bihain long sampela de ol brata i lukautim sipsip longwe liklik long ples, na Jekop i salim Josep i go na lukim sapos ol i stap gut o nogat.

Em nau, man bilong driman i kamap.

Mi les pinis long tok bilong em, Yumi pinisim em.



Yumi no ken kilim brata bilong yumi. Mobeta yumi tromoim em i go daun long olupela hul wara.

Oke, Ruben. I gat wanpela hul klostu.

Bihain bai mi kisim em...



Holim em.

Lukaut yu brukim klos bilong mi.

Maski kot bilong yu. I no gat wok bilong en nau.

Ol brata longlong.

Ol sipsip i pret long ol dispela nos dispela nois. Bai mi go lukautim ol.



Singaut planti. I no gat man i ken harim yu.

Nogat.. plis.

Bai yu driman olsem wanem long dispela hul?



Mi gat wanpela arapela aidia...

Used by permission of the David C. Cook Foundation. Copyright 1973, David C. Cook Publishing Co. All rights reserved.

**OL BRATA I SALIM JOSEP**

(Jenesis 37: 27 - 36; 39: 1 - 20)

Josep i wet insait long hul na ol brata i kibung long ol i laik mekim wanem

Lukim ol bisnisman i kam. Mipela i ken salim Josep long ol olsem wokboi. Olsem bai em i klia long rot bilong mipela.



Olsem ol brata i pulim Josep i kam antap bek.



Em hia wokboi bilong mipela. Yupela i laik baim em long hamas?

Man, em i namba wan boi. Bai mipela inap kisim gutpela pe long em.

Mi givim yupela 20 sekel.

Tasol

Pasim maus boi.

Oke, i orait. Yu ken kisim.

Bihain ol bisnisman i go pinis, orait, nau Ruben i kamap.



Josep i stap we? Yupela i mekim wanem long em?

Ol bisnisman bilong Isip i baim em. Em hia hap mani bilong yu.

Yupela salim em long mani. Bai yupela i tok wanem long papa?

Mipela putim blut bilong meme long kot bilong em na tokim papa wampela laion i kilim em.

Ol brata i kamap long kem na ol i mekim olsem tasol.

Mipela i painim dispela kot i gat blut... ating?

Long dispela taim Josep i kamap pinis kong Isip na ol i salim em gen long bikipela mani.

Lukim dispela boi, em i nais na strong. Em bai gutpela wokboi bilong haus bilong king yet. Yupela givim hamas long em?

30 Sekel..



Em bilong Josep. Ating wampela laion i pinisim em. Sore....

Mi slev nau. God yu helpim mi nau...

Olsem na pikinini bilong Jel bilong Jekop i kamap slev bilong Potifa, em kepten bilong ol soldia bilong king. Tasol God i no lusim ting long em... Em i gutpela

Em i arakain man. Yu tokim mi moa long em...



Bihain long sampela yia Potifa i makim Josep bosman bilong olgeta samting bilong em.



Sampela bisnisman i kam long kantri Kenan na bringim em i kam.

Em i strong na i gat save.

Sapos yu putim narapela klos long em, em inap long king...



Josep i save mekim olgeta samting i ran gut.

Em i save pre olgeta de na askim God bilong em helpim em.

Josep i luk nais tru na wampela de taim Potifa i stap longwe, meri bilong em i grisim em long mekim rong



Josep, yu kam sindaun wantaim mi na stori long mi long laip bilong yu...

Tenkyu, misis... tasol mi gat planti wok...



Watpo oltaim yu ting long Potifa tasol?

Em i masta bilong mi... Mi laik harim tok bilong em.

I no gat man i ken givim baksait long mi...

Em i wet i stap na taim Potifa i kam hek em i giaman i krai na i trik



Taim yu no stap, dispela wokboi i kam traime mi, tasol mi singaut na em i ranawe i go. Mi holim dispela kot bilong em.

Bai mi kalabusim em

Olsem na ol plisman i kam na holimpasim Josep na putim em long kalabus.



Man, naispela boi tru i kam long kalabus.

Bihain bai klos bilong em i no nais moa. Yu wet... bihain em i wankain olsem mipela.

Used by permission of the David C. Cook Foundation. Copyright 1973, David C. Cook Publishing Co. All rights reserved.



*Poto antap i soim Leptenan Kenel Josiah i givim medal bilong Kwin long Sif Waran Ofisa Oi-Meve bilong Galp Provins. Em i winim 26 yia olsem soldia. Na Koporal Vele Bilong Kapare Viles klostu long Rigo long Sentral Provins.*

*Poto daunbilo i soim nupela Minista bilong Difens, Mista Louis Mona, i glasim gut ol soldia bilong 2 PIR long Moem Bareks long Wewak.* (Tupela Ami poto)



*Tripela poto long dispela hapsait i soim bikpela stua bilong Steamships long Port Moresby bihain paia i bin kukim em long Sarere 17 Septemba. Em i wanpela bikpela stua tru long Moresby na ol paiaman i no inap long mekim dai paia. Tasol i no gat man i lusim laip. Paia i krungutim bikpela ain tru na olgeta buk na redio na klos long dispela hap stua i kuk olgeta*



## BAIM WANTOK

Sapos yu laik kisim WANTOK niuspepa i kam long yu stret olgeta wan wan wik bilong dispela yia, yu katim dispela tiket long sisis na salim i kam wantaim K8.00.

NEM BILONG YU: .....

ADRES BILONG YU: .....

.....

Salim sek o mani oda inap long K8.00 wantaim dispela tiket i kam long:

**WANTOK  
BOX 1982  
BOROKO**

Sapos yu bilong wanpela skul o misin o grup na yu laik kisim moa olsem 10-pela WANTOK wantaim long olgeta wan wan wik, orait yu rait na askim mipela long spesel prais mipela i gat long man i baim planti WANTOK olsem.



*Bikpela haus daunbilo i stap long biktaun New York long Amerika. Em i hetkota bilong Yunaitet Nesens. (Poto i kam long Yunaitet Nesens.)*





# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.